

Индер ауданында бейбіт жиналыстар, митингілер, шерулер, пикеттер және демонстрациялар өткізу тәртібін қосымша реттеу туралы

Күшін жойған

Атырау облысы Индер аудандық мәслихатының 2016 жылғы 15 ақпандағы № 349-V шешімі. Атырау облысының Әділет департаментінде 2016 жылғы 9 наурызда № 3471 болып тіркелді. Күші жойылды - Атырау облысы Индер аудандық мәслихатының 2020 жылғы 18 қыркүйектегі № 395-VI (алғашқы ресми жарияланған күнінен кейін күнтізбелік он күн өткен соң қолданысқа енгізіледі) шешімімен

Ескерту. Күші жойылды - Атырау облысы Индер аудандық мәслихатының 18.09.2020 № 395-VI (алғашқы ресми жарияланған күнінен кейін күнтізбелік он күн өткен соң қолданысқа енгізіледі) шешімімен.

"Қазақстан Республикасында бейбіт жиналыстар, митингілер, шерулер, пикеттер және демонстрациялар ұйымдастыру мен өткізу тәртібі туралы" Қазақстан Республикасының 1995 жылғы 17 наурыздағы Заңының 10-бабына, "Нормативтік құқықтық актілер туралы" Қазақстан Республикасының 1998 жылғы 24 наурыздағы Заңының 21-1-бабына, "Қазақстан Республикасындағы жергілікті мемлекеттік басқару және өзін-өзі басқару туралы" Қазақстан Республикасының 2001 жылғы 23 қаңтардағы Заңының 6-бабының 1 тармағының 15) тармақшасына сәйкес, аудандық мәслихат **ШЕШІМ ҚАБЫЛДАДЫ:**

1. Индер ауданында бейбіт жиналыстар, митингілер, шерулер және демонстрациялар өткізу орындары мен маршруттары 1 қосымшаға сәйкес белгіленсін.

2. Индер ауданында бейбіт жиналыстар, митингілер, шерулер және демонстрациялар өткізудің тәртібі 2 қосымшаға сәйкес бекітілсін.

3. Аудандық мәслихаттың 2015 жылғы 26 наурыздағы № 266-V "Индер ауданында жиналыстар, митингілер, шерулер, пикеттер мен демонстрациялар өткізудің тәртібін қосымша реттеу туралы" шешімінің (нормативтік құқықтық актілерді мемлекеттік тіркеудің тізілімінде № 3191 санымен тіркелген, аудандық "Дендер" газетінде 2015 жылғы 21 мамырда жарияланған) күші жойылған деп танылсын.

4. Аудандық мәслихаттың 2016 жылғы 13 қаңтардағы № 344-V "Аудандық мәслихаттың 2015 жылғы 26 наурыздағы № 266-V "Индер ауданында

жиналыстар, митингілер, шерулер, пикеттер мен демонстрациялар өткізудің тәртібін қосымша реттеу туралы" шешіміне өзгерістер енгізу туралы" шешімі жойылсын.

5. Осы шешімнің орындалуын бақылау аудандық мәслихаттың әлеуметтік саясат, білім беру, мәдениет, денсаулық сақтау, жастар ісі, құқық қорғау, депутат этикасы мәселелері жөніндегі тұрақты комиссияға (А. Доспаева) жүктелсін.

6. Осы шешім әділет органдарында мемлекеттік тіркелген күннен бастап күшіне енеді, ол алғашқы ресми жарияланған күнінен кейін күнтізбелік он күн өткен соң қолданысқа енгізіледі.

*Аудандық мәслихаттың кезектен тыс
XXXVI сессиясының төрағасы,
мәслихат хатшысы*

Б. Сапаров

Аудандық мәслихаттың 2016 жылғы "15"
ақпандағы № 349-V шешіміне 1 қосымша

Индер ауданында бейбіт жиналыстар, митингілер өткізу орындары

№	Елді мекеннің атауы	Орын
1	Индербор кенті	Тухфатов көшесі, Жеңіс саябағы
2	Индербор кенті	Қонаев көшесі, Демалыс саябағы

Индер ауданында шерулер және демонстрациялар өткізу маршруттары

№	Елді мекеннің атауы	Орын
1	Индербор кенті	Қонаев көшесіндегі № 24 үйден бастап Қонаев көшесіндегі № 12 үйде орналасқан "Индер ауданы әкімі аппараты" мемлекеттік мекемесінің ғимаратына дейін
2	Индербор кенті	Бейбітшілік көшесіндегі № 1 үйде орналасқан "Индер ауданы Индербор кенті әкімі аппаратының "Индер-Мәдениет" мемлекеттік қазыналық коммуналдық кәсіпорыны ғимаратынан бастап Ұлы Отан соғысында қаза тапқандарға арналған обелискке дейін

Аудандық мәслихаттың 2016 жылғы "15"
ақпандағы № 349-V шешіміне 2 қосымша

Индер ауданында бейбіт жиналыстар, митингілер, шерулер, пикеттер және демонстрациялар өткізуді қосымша реттеу тәртібі

1. Бейбіт жиналыстарды, митингілерді, шерулерді, пикеттерді немесе демонстрацияларды өткізу кезінде уәкілдер (ұйымдастырушылар), сондай-ақ басқа да қатысушылар қоғамдық тәртіпті сақтауға міндетті.

2. Шараларды ұйымдастырушылар мен оларға қатысушылардың:

- 1) көліктің және жаяу жүргіншілердің қозғалысына бөгет жасауына;
- 2) елді мекеннің инфрақұрылым объектілерінің үздіксіз жұмыс істеуіне кедергі келтіруіне;

3) ауданның жергілікті атқарушы органдардың рұқсатынсыз киіз үйлер, шатырлар, өзге де уақытша құрылыстар тұрғызуына;

4) шараны өткізу кезінде қоғамдық тәртіпті қамтамасыз етуші мемлекеттік органдар өкілдерінің қызметіне кез келген нысанда араласуына;

5) жасыл желектерге, шағын сәулет нысандарына залал келтіруіне;

6) өзімен бірге суық қаруды, атыс және өзге де қаруды, сондай-ақ адамдардың өмірі мен денсаулығына қарсы азаматтарға, және заңды тұлғалардың меншігіне материалдық залал келтіру үшін пайдаланылуы мүмкін арнайы жасалған немесе бейімделген заттарды алып жүруіне;

7) алкагольдік және есірткілік масаң күйде қатысуға жол берілмейді.

3. Бейбіт жиналыстар, митингілер, шерулер, пикеттер немесе демонстрациялар өткізу орындарында:

1) алкагольдік ішімдіктер ішуге, есірткілік заттар пайдалануға, психотроптық заттарды және олардың аналогтары;

2) транспаранттарды, ұрандарды, өзге де материалдарын (визуальды аудио/бейне) пайдалануға, қоғамдық тәртіпті бұзуға, қылмыстар жасауға көпшілік алдында сөйлеуге шақырған, сондай-ақ әлдебір кісінің атына қатысты тіл тигізуге жол берілмейді.

4. Пикеттер өтініште көрсетілген мақсатқа сәйкес, белгіленген мерзімде және келісілген жерде өткізіледі.

5. Пикеттер өткізілген кезде:

1) пикет өткізілетін объектіде отыруға, тұруға;

2) көрнекілік үгіт құралдарын пайдалануға;

3) қысқа ұрандарды айғайлап айтуға, пикет тақырыбы туралы сөздер қозғауға рұқсат беріледі.

6. Пикетті өзге нысанда митингіге, бейбіт жиналысқа, шеруге немесе демонстрацияға жалғастыру үшін заңда белгіленген тәртіп бойынша ауданның жергілікті атқарушы органынан рұқсат алу қажет.

7. Ауданның жергілікті атқарушы органынан бейбіт жиналыс, митингі, шеру, пикет немесе демонстрациялар өткізу үшін бас тартылған жағдайда немесе оны өткізуге тыйым салу туралы шешім қабылданған болса, ұйымдастырушылар тез арада дайындық шараларын болдырмауға ықтимал қатысушыларды тиісті дәрежеде жария етудің шараларын қабылдайды.

Егер бейбіт жиналысты, митингіні, шеруді, пикетті немесе демонстрацияны өткізудің мақсаты Республиканың конституциялық құрылысын күштеп өзгертуге, оның тұтастығын бұзуға, мемлекет қауіпсіздігіне нұсқан келтіруге, әлеуметтік, нәсілдік, ұлттық, діни, тектік-топтық және рулық араздықты қоздыруға байланысты болса, сондай-ақ Конституцияның басқа да ережелері, заңдары және Қазақстан Республикасының өзге де нормативтік актілері бұзылса немесе

азаматтардың қауіпсіздігіне және қоғамдық тәртіпке қауіп төнсе өткізуге жол берілмейді.

8. Егер өтініш берілмеген болса, тыйым салу туралы шешім шығарылса, өткізу кезінде тәртіп бұзылған жағдайда, сондай-ақ азаматтардың өмірі мен денсаулығына қауіп төнетін, қоғамдық тәртіп бұзылатын жағдайда бейбіт жиналыстар, митингілер, шерулер, пикеттер мен демонстрациялар ауданның жергілікті атқарушы орган өкілінің талап етуі бойынша сөзсіз тоқтатылуы тиіс.

9. Ауданның жергілікті атқарушы орган өкілінің талабын орындаудан бас тартылған жағдайда оның нұсқауы бойынша ішкі істер органдары бейбіт жиналысты, митингіні, шеруді, пикетті және демонстрацияны тоқтату жөнінде қажетті шаралар қолданады.

10. Бейбіт жиналыстарды, митингілерді, шерулерді, пикеттерді және демонстрацияларды ұйымдастыру мен өткізудің белгіленген тәртібін бұзған адамдар Қазақстан Республикасының заңдарына сәйкес жауап береді.

11. Бейбіт жиналыстарды, митингілерді, шерулерді, пикеттерді және демонстрацияларды өткізу кезінде оларға қатысушылардың азаматтарға, қоғамдық бірлестіктерге, мемлекетке келтірген материалдық залалы үшін Қазақстан Республикасының заңнамасымен белгіленген тәртіп бойынша өтелуге жатады.

12. Бейбіт жиналыс, митинг, шеру, пикет және демонстрация өткізілетін жерде барлық қосымша туындаған шығындарды, соның ішінде қоғамдық тәртіпті сақтау, үй-жайлар беру, санитарлық тазарту, жарық беру және радиоландыруды ұйымдастырушылар өтейді.